

## ATODLEN 15

### RHYDDHAD AR GYFER TRAFODIADAU PENODOL SY’N YMWNEUD Â THAI CYMDEITHASOL

#### RHAN 3

##### LESOEDD RHANBERCHNOGAETH

*Les ranberchnogaeth: dewis triniaeth gwerth marchnadol ar gyfer premiwm pan ganiateir  
cynyddu perchentyaeth*

- 5 (1) Mae’r paragraff hwn yn gymwys pan fo—
- les yn cael ei rhoi—
    - gan gorff cymwys, neu
    - yn unol â’r hawl i brynu a gadwyd,
  - yr amodau yn is-baragraff (2) wedi eu bodloni, ac
  - y prynwr yn dewis i dreth gael ei chodi yn unol â’r paragraff hwn.
- (2) Yr amodau yw—
- bod rhaid i’r les fod ar gyfer annedd;
  - bod rhaid i’r les roi’r hawl i ddefnyddio’r annedd i’r tenant, a neb arall;
  - bod rhaid i’r les ddarparu y caiff y tenant, ar ôl talu swm, ei gwneud yn ofynnol i delerau’r les gael eu hamrywio fel bod y rhent sy’n daladwy oddi tani yn cael ei ostwng;
  - bod rhaid i’r les gael ei rhoi yn rhannol fel cydnabyddiaeth ar gyfer rhent ac yn rhannol fel cydnabyddiaeth ar gyfer premiwm a gyfrifir ar sail—
    - y premiwm y gellir ei gael ar y farchnad agored am roi les sy’n cynnwys yr un telerau â’r les ond gan roi’r isafswm rhent yn lle’r rhent sy’n daladwy o dan y les, neu
    - swm a gyfrifir ar sail y premiwm hwnnw;
  - bod rhaid i’r les gynnwys datganiad o’r isafswm rhent ynghyd ag—
    - y premiwm y gellir ei gael ar y farchnad agored, neu
    - y swm a gyfrifir ar sail y premiwm hwnnw,y cyfrifir y premiwm ar ei sail.
- (3) O ran dewis i dreth gael ei chodi yn unol â’r paragraff hwn—
- rhaid cynnwys hynny ar y ffurflen dreth a ddychwelir mewn cysylltiad â rhoi’r les (neu mewn diwygiad i’r ffurflen dreth honno), a
  - mae’n ddi-alw’n-ôl, fel na chaniateir diwygio’r ffurflen er mwyn tynnu’r dewis yn ôl.
- (4) Pan wneir dewis o dan y paragraff hwn cymerir mai’r gydnabyddiaeth drethadwy ar gyfer rhoi’r les ar wahân i rent yw’r swm a nodir yn y les yn unol ag is-baragraff (2)(e)(i) neu (ii).
- (5) Yn y paragraff hwn, ystyr “isafswm rhent” yw’r rhent isaf a allai ddod yn daladwy o dan y les pe bai’n cael ei hamrywio fel a grybwyllir yn is-baragraff (2)(c) ar y dyddiad y rhoddir y les.